

# La clamada dil guardiaselvaschina

En discuors cun Werner Degonda, guardiaselvaschina, Cumpadials


## Florentina Camartin

*Signur Degonda, Vus essas dapi 1986 en uffeci sco guardiaselvaschina, saveis pia miraranavossin 25 onnsenquell'activitad. Sch'ins discuora cun Vus, survegn ins l'impressiun che Vus seigies fetg venti-reivels d'haver quella clamada. Co eis ei vegniu adaquella?*

Gie, jeu astgel bein dir ch'il fatg ch'jeu hai astgau daventar successur da miu bab ch'ei staus biars onns en quei uffeci ei stau per mei la realisaziun dad in sie-mi. Gia da pign ensi sun jeu staus fetg attaschaus alla natira, observavel fetg bugen ils utschals e tut quei che sefageva zanua en nies contuorn. Inagada carschius hai jeu beinprest, numnademain igl onn 1974, fatg igl examen da catscha e sun vegnius catschadur. Jeu sun adina staus fetg ligiaus cun las selvaschinas sco era cun la Val Sumvitg e cun nos cuolms.

*Haveis Vus fatg ina scolaziun specifica per saver surprender quella piazza?*

Ei dat buca ina scolaziun specifica per saver surprender quella piazza. Zatgi che s'interessescha per in tal post sto denton haver bunas enconuschientschas dallas selvaschinas e lur basegns.



Jeu hai oriundamein empriu da preparader d'animals, quei vul dir da stuppar ora animals e da montar trofeas. Quei emprendissadi hai jeu fatg en ina fätschenta privata a Cuera e terminau el a Fläsch. Silsuenter sun jeu serendius a Turitg ed hai luvrau leu duront quater onns e miez el spital d'animals sco preparader medicinal. Nus vevan da preparar oravontut scalets d'animals ed era da far bia preparats per students che studegian da veterinari. Silsuenter hai jeu entschiet a schar encrescher pils cuolms e la finala hai jeu tertgau: «Na, gliez, giu Turitg sai jeu buca star mi'entira veta!» Pia sun jeu turnaus ensi, era in tec cun l'idea da s'annunziar in di

per la piazza che jeu hai oz, e quei sco successur da miu bab. Returnaus en tia-ra romontscha hai jeu absolviu ils onns 1976–1978 la scola dalla polizia cantu-nala a Cuera. Ils onns 1978 tochen 1986 sundel jeu staus staziunaus sco polizist primo a Cuera e suenter a Mustér. Igl onn 1986 ei miu bab vegnius pen-siunaus e quei ha motivau mei da s'annunziar per quella piazza. Jeu hai lu giu il cletg da survegnir ella. Damai ch'il territori da survigilonza ch'jeu hai giu da surprender era quel dalla vischnaunca da Sumvitg, vein nus midau casa e stein dapi lu cheu a Cumpadials, nua che jeu sun naschius e carschius si. Cun la lavur san ins emprender el decuors dils onns l'enconuschiantscha professiunala ne-cessaria. Plinavon hai jeu absolviu igl onn 1989 il cuors fundamental intercan-tunal per guardiaselvaschinas a Lyss. Igl onn 2007 eis ei reussiu d'obtener il cer-tificat professiunal federal sco guardia-selvaschina ch'ei vegnius surdaus quei onn en Svizra per l'emprema gada.

*Sco guardiaselvaschina veis Vus pia la clamada che schai a Vus veramein a cor. Co sedistingua la clamada dil guardiaselva-schina dalla clamada dil guardiacatscha ni meglier detg survigilader da catscha?*  
Dapi uonn dat ei negina differenza quei che partegn il num. Naven digl 1. da schaner 2011 senumna la clamada dils emploiai digl uffeci da catscha e pesca

numnadamein u guardiaselvaschina ni guardiapesca. E tuttina dat ei diffe-renzas en la relaziun d'engaschament. Ei dat plazzas sco guardiaselvaschina che pretendan in pensum da lavur cumplein, pia da 100%, ferton ch'ei dat era talas cun in engaschi parzialnaven da 50% ensiviars. Il cantun Grischun ei partius si en 12 districts da catscha pils quals mintgamai in cau ei responsabels. Il district da catscha 1, Rein Anterior ch'ei identics cun il territori dalla Cadi, ei adossaus a mi. Il menader dil district sto haver la survesta sur digl entir in-tsches confidaus ad el. Per saver adem-plir optimal quellas lavurs ei la Cadi par-tida en 5 territoris da survigilonza. En Tujetsch ei Gabriel Monn, enta Medel Daniel Bundi, si Mustér Thomas Dur-schei e per Trun, Schlans e Breil ei Gion Bundi responsabels. Il guardiaselvaschi-na Daniel Bundi ei era miu substitut. Mintga guardiaselvaschina survigile-scha siu territori, ha la survesta da quel quei che appertegn fauna e flora ed ha aunc bia differents pensums. Ils guardia-selvaschinas ein suttamess al cau dil district ed han da rapportar ad el min-tga meins sur dalla lavur prestada sco era dall'aura, dallas relaziuns da neiv, dalla maglia e dil stan dallas selvaschi-nas, sur dil diember d'animals curdai, sur dalla biologia e nua che las selva-schinas sesanflan, sur dallas lavurs da tgira, donns da selvaschinas e polizia da

catscha. Sin fundament da quellas indicaziuns e dallas atgnas observaziuns fa il cau dil district in rapport meinsil per il territori dalla Cadi e tarmetta quel a Cuera per mauns dil responsabel digl uffeci da catscha, dr. Georg Brosi. Sper l'incumbensa da menar il district hai jeu aunc da survigilar miu territori da survigilanza, il qual ei identics cun la vischnaunca da Sumvitg cun ina surfatscha da 10 183 ha. En quella surfatscha ei era in ton digl asil da catscha federal Pez Vial – Greina integraus. Ils pensums ch'jeu hai d'exequir san ins circumscriver grob cun funcziuns da tgira, planisaziun da catscha e polizia da catscha.

*Sco il num guardiaselvaschina di essas Vus quel che stat en per il beinstar dalla selvaschina, per siu spazi da viver e siu ruaus. Co fageis Vus attenta la publicitat sils basegns dils animals selvadis ed ils utschals en nossa vallada?*

Quei sefa inagada cun ils contacts ch'jeu hai e tgirol, seigi quei cun autoritads, cun catschadurs, cun selviculturs regiunals e communals, cun ils differents uffecis cantunals e communals, cun purs, cun ils responsabels dil turissem ni cun hospes da vacanzas e meinsvart era cun entiras classas da scola. Plinavon vegn informau tenor basegns la pressa, radio e televisiun. Secapescha che nus fagein adina part allas radunonzas da catschadurs localas e regiunalas e dein

las informaziuns necessarias partenent las selvaschinas e la catscha.

*Co vesa in di da lavur dad in guardiaselvaschina ora?*

Quel ei fetg varionts e dependa dallas diversas stagiuns. Igl unviern ei nies pensum buca schi intensivs sco duront las otras stagiuns. En unviarns cun bia neiv han ils animals selvadis naturalmein pli grev da vegnir atras. Beinenqualin sto su ttacumber alla nevada ed alla ferdaglia. Nus fagein stem sin las turas da survetsch da «nossas selvaschinas», e sche nus cattein adagur talas ch'ein idas alla malura, intercurin nus quellas per definar il daco ch'ellas ein ventschidas. Plinavon eruin nus la vegliadetgna e prendein entginas mesiras arisguard la constituziun, las qualas dat tan sclariment sur dalla carschientscha digl animal. Dat ei en loghens memia bia selvaschinas, ei la carschientscha pintga e las peisas bassas. Tuts animals selvadis inclusiv utschleglia vegnan registrati cun nudar era il liug nua che nus vein anflau els. Meinsvart annunzia era in ni l'auter viandont ch'el hagi cattau adagur in cadaver, p. ex. in vadi tscharva. Per talas indicaziuns essan nus fetg engrazieivels.

Oravontut fagein nus igl unviern las controllas dallas zonas da raus pils animals. En quellas zonas da raus astga il carstgaun buca passar. Ellas ein surscha-

das als animals selvadis e cun quellas vulins promover il ruaus dallas selvaschinas e sut circumstanzas era il schurmetg digl uaul. Talas zonas da schurmetg havein nus ella Cadi buca meins che 20. Ellas ein signalisadas e registradas ella planisaziun locala da vischnaunca e marcadas elllas cartas da turas da skis ni gianellas ed els prospects dallas uniuns da turissem. Quella signalisaziun cun strehs verds ed alvs indichescha ch'ins hagi da desister da scadin disturbi dils animals, pia ch'ins astga buca passar en quels territoris.

In da nos pensums ei era dad adina puspeifar attents e declararl'impurtonza da quellas zonas. Quei fagein nus meins-vart era cun tener referats en scolas ni en cerchels interessai per la natira. P.ex. organisescha la Pro Juventute en siu program per scolars che senumna «Pass da vacanzas» la pusseivladad d'accumpignar il guardiaselvaschina sin ina tura ni l'autra per saver observar ils animals selvadis. Per beinenqual affon ei quei lu ina gronda sfida da levar gia allas tschun per saver ir cul guardiaselvaschina. Mo il sforz sepaga damai che l'observaziun dils animals ella biala natira ei in ver deletg.

Ina caussa fascinonta ei mintgamai era da far las dumbraziuns dils animals selvadis. El decuors digl onn, denton principalmein la primavera dumbrein nus las selvaschinas d'ungla, pia tscharvas,

camutschs cavreuls e capricorns. Nus nudein il diember, cun excepciu dallas tscharvas distinguin nus la schlattetina e la vegliadetgna denter madirs, giuvens ed anseuls. Plinavon dumbrein nus las lieurs, ils cots da draussa ed ils urlauns. Sin fundament da quellas dumbraziuns savein nus constatar co igl unviern ei staus per las selvaschinas, pia sch'igl ei stau in bien unviern per elllas ni in unviern ruh e dir che ha pretendiu bia unfrendas. Las cefras da quellas dumbraziuns ein indispensablas per la planisaziun da catscha. Igli intent dalla planisaziun ei numnadamein d'obtener colonias saunas da selvaschinas ch'ein adattadas allas relaziuns localas e ch'ein structuradas en moda naturala e san plinavon vegnir tratgas a nez cunvegnentamein cun la catscha.

*Co succeda p.ex. la dumbraziun da tscharvas?*

Las tscharvas dumbrein nus duront la notg. La medema notg ein 12 equipas, mintgina cun 6 participants, sin viadi per dumbrar en l'entira Surselva. Quei fagein nus mintgamai sin in jeep cun punt aviarta. Sin quella ein quater persunas sepostadas: in guardiaselvaschina, representants dils catschadurs e dil forestalessier e sche pusseivel in pur. Cun quellas persunas ein ils interess communabels da tuts pertuccai risguardai. Praus e pastiras vegnan sclari cun reflec-



**Aschia vesan ins las tscharvas la notg en la glisch dils reflecturs.**

Foto: Walter Tomaschett

turs da maun. Lu vegnan las tscharvas dumbradas e quei mintg'onn tenor la medema ruta. Il guardiaselvaschina sin la punt ei il cau, tuts miran ed observan, dumbran e la finala communichescha il cau al protocolist il diember dallas tscharvas observadas. Il scarvon che ha priu plaz en la cabina sper il manischunz noda il resultat sil protocol. Secapescha ch'ins dumbra e protocolescha era ils auters animals ch'ins vesa quella notg da dumbraziun da tscharvas.


*Circa contas tscharvas vegnan mintgamai dumbradas en nies territori?*

La dumbraziun da tscharvas ei vegnida realisada uonn la notg dils 31 da mars


sin igl 1. d'avrel 2011. Sin il territori dalla Cadi ein vegni protocolai ils suandonts diembers dils differents animals: 840 (794) tscharvas, – en parentesa mintgamai il diember dallas selvaschinas ch'ein vegnididas dumbradas igl onn avon – 101 (99) cavreuls, 5 (0) camutschs, 6 (19) tais, 23 (47) uolps, 3 (1) fiergnas, 53 (35) lieurs brinas, 3 (1) lieurs alvas ed udiu il clom 1 (0) cauracorn (Waldkauz).

Aschia rimnein nus las informaziuns dil svilup dils animals selvadis, e sin fundament da quellas cefras vegn lu decidiu cons animals da tgei sort che astgan ni dueien vegnir sittai duront il temps da catscha.

**Dumbraziun da tscharvas en la Cadi  
naven da 1987 tochen 2011**



**Svilup dalla dumbraziun da tscharvas en  
cumparegliazion cun las tscharvas sittadas  
naven da 1987 tochen 2010 en la Cadi**





**Cavreuls cul peil d'unviern.**

Foto: Werner Degonda

Ils cavreuls dumbrein nus la primavera en sis loghens definai. Per part succedan quellas acziuns entras in sulet guardiaselvaschina ni communablamein, quei tenor la veseivladad dil territori.





**Camutschs viaden egl atun.**

Foto: Werner Degonda

Quellas dumbraziuns vegnan fatgas mintgamai encunter sera tochen ch'ei vegn stgir. Nus distinguin denter bucs, cauras ed anseuls masculins e feminins da cavriel.

### Dumbraziun da cavreuls en sis territoris mintgamai la primavera naven da 1995 tochen 2011





Era il diember dils camutschs vegn eru-  
ius, e quei mintga quartal en siat lo-  
ghens definai. Per part dat ei territoris  
ch'in guardiaselvaschina sa realisar  
quella lavour. Denton dat ei era da quels  
che nus essan duront igl entir di en  
tschun en aczjun. Quellas dumbraziuns  
vegnan fatgas duront il di e nus distin-  
guin denter bucs, cauras, giuvens, pia  
stargels ed anseuls da camutsch.

Secapescha vegnan tuts resultats dal-  
las dumbraziuns nudai. Cheu vein nus  
p. ex. ina tala tabella cun las dumbra-  
ziuns dils capricorns dalla vart senistra  
dil Rein Anterior naven dall'Alpsu tochen  
la Val Frisal che nus observein e dum-  
brein. Quels dumbrein nus principal-  
mein il matg. Lu ein els setratgs empau

pli a bass ed ein vesibels meglier, damai  
che lur peil d'unviern ei sblihius dil  
sulegl duront igl unviern. Ei vegn mar-  
cau il territori dalla dumbraziun, la sort  
ed il diember dils animals dumbrai sco  
era il datum.

#### Capricorns en Val Frisal, 2008.



Foto: Daniel Bundi

## Dumbraziuns da capricorns 2010

Colonia Nr. 8/Alpsu–Tödi–Calanda/territori Alpsu–Frisal

Territori da dumbraziun	bucs				Total	cauras	giuvens 1–2	total	Remarcas datum dalla dumbraziun
	3–5	6–10	11+	?					
Val Val	1	7			8	8	5	21	22.5.2010
Val Giuv	3	4	1		8	9		17	22.5.2010
Val Strem	14	12	1		27	33	24	84	20.5.2010
Val Gronda da Cavrein	3	5			8	12	4	24	19.5.2010
Cuolm Tgietschen	5	6			11	11	3	25	11.5.2010
Pez Avat					0			0	19.5.2010
Pez Ner	1	1			2	4	3	9	25.5.2010
Val Punteglias	2	3	1		6	16	7	29	25.5.2010
Val Frisal	13	12	4		29	40	21	90	21.5.2010
<b>Total</b>	<b>42</b>	<b>50</b>	<b>7</b>	<b>0</b>	<b>99</b>	<b>133</b>	<b>67</b>	<b>299</b>	*rs 1:1,34
%-part procentuala	14,05 %	16,72 %	2,34 %	0 %	33,11 %	44,48 %	22,41 %	100 %	
<b>Total 2009</b>	<b>42</b>	<b>52</b>	<b>9</b>	<b>0</b>	<b>103</b>	<b>101</b>	<b>80</b>	<b>284</b>	<b>rs 1:0,98</b>
%-part procentuala	52 %	18,31 %	3,17 %	0 %	36,27 %	35,56 %	28,17 %	100 %	

\* rs = relaziun denter las schlatteinas; bucs : cauras

Pli baul era la finamira dalla lescha federala da catscha e dil schurmetg dall'utschleglia che datava dils anno 1925 igl augment dil diember da selvaschinas ed il schurmetg dils animals giuvens. Dapi igl onn 1986 exista la lescha federala da catscha e dil schurmetg da maifers selvadis ed utschals cun la maxima ch'ils cantuns hagien da reglar e planisar la catscha. Quei ha effectuau che la lavur dil guardiaselvaschina ei vegnida bia pli interessanta.

Viaden el matg e zercladur marchein nus era ils anseuls dils cavreuls. Quei daventa cun ina pintga marca. Aschia savein nus persequitar quals che scompan, nua ch'els ein e nua ch'els van, sco era con vegls els vegnan. Cun marcar il pign e falomber ansiel, sortescha quel ord la massa anonima sco member dalla medema specia tier in individu signaus clar e bein. Tut quellas marcas vegnan registradas per l'entira Svizra a Berna e beinsavens dat ei la sur-

presa ch'in cavriel, ch'ei vegnius marcaus p.ex. en Tujetsch, vegn sittaus vi Glaruna ni naven dalla Val Medel el Tessin.

Era ils cots e las gaglinas da draussa dumbrein nus mintg'onn. Quei utschi ei aunc dètg derasaus cheu tier nus.

Medemamein eruin nus mintgamai il zercladur il diember dils urlauns (Schneehühner). Per far quei ston ins ir siado els aults tochen sur 2000 m s.m. e star sin divers posts gia la damaun dalas treis. Cura ch'ei entscheiva lu a far dis aud'ins lur clamar: aaahrh (in cert sgarar plitost). Quels cloman magari mo ina ni duas ga. Lu ha ei num ir a

mirar nua ch'els ein, sch'igl ei mo intgiet ni sch'igl ei in pèr, pia tgiet e gaglina, ensem enzanua davos in crap ni en ina ruosna. Cun excepiun d'ina part dallas plemas neras dalla cua ein els duront igl unviern resch alvs e pér viaden el decuors dalla primavera vegnan els gagls: grisch-alv-brin-ner ed han la grondezia d'ina pluscheina.

Quels utschals astgan ins era sittar da catscha bassa, naven dils 16 d'october tochen ils 30 da november. Nus vein denton ina partida asils da selvaschinas, aschia ch'igl ei buca prighel ch'els vegnien extirpai sch'ils catschadurs settan mintgaton in urlaun.

### Ansiel-cavriel, Val da Tgauras.



Foto: Daniel Bundi, 28-5-2008

### Urlaun.



Foto: Heinz Guler

*Saver observar tals utschals en quei mund muntagnard ei bein zatgei fetg fascinont!* Gie, l'ornitologia ha adina interessau mei zun fetg e quei gia da buob. Ferton che mes camerats mavan a fagend da sezuppar e da pigliar pil vitg entuorn, mavel jeu tut persuls cheu sisu il vitg che nus numnein Pigniu, ed observavel ils utschals. Cu miu bab ha fatg persenn quei, ha el regalau a mi in cudisch d'utschals, «DIE VÖGEL EUROPAS», da Peterson/Mountfort/Hollom. Da quel sun jeu staus tut incantaus ed hai passentau bia uras tut persuls cun emprender ils numbs dils divers utschals e dad observar els e lur cunfar. Jeu vevel quella predilecziun pils utschals e quella hai jeu dil reminent aunc oz. Jeu vevel gia da buob la finamira d'emprender d'enconuscher tut ils utschals en nossa cuntrada, e perquei mavel jeu stediamein ad observar ils utschals.

Nus observein pia ils cots e las gaglinas da draussa, ils urlauns, ils sprers ed ils tschéss ed era las tschuettas e lur cunfar viaden ella notg. Specialmein interessant eis ei d'observar co ils tschéss fan lur ignivs per cuar ora e trer si lur pign(s). Da present vein nus edisch përs che han lur ignivs en la Cadi. Era il tschéss barbet ch'ins ha repatriau en las Alps vein nus saviu observar meinsvart en nossas vals. In fetg bien liug per tals fuss la Val Frisal cun sias preits crap e bials cuvels.

Tut quellas observaziuns d'utschals che nus fagein tarmettein nus cun in program special agl observatori ornitologic «Vogelwarte» a Sempach. Aschia han els enzatgei da nus e nus survegnin, sche nus duvrein, indicaziuns ed informaziuns dad els, aschia che nus vein ina buna collaboraziun pil bien dalla caussa.

Duront la primavera ed igl atun tgirein nus ensemens cun ils catschadurs principalein ils spazis d'unviern dallas selvaschinas. Quellas lavurs succedan il bia las sondas. Nus tgirein oravontut ils biotops, q.v.d. nus tagliein anavos las caglias e mirein ch'ei possi crescher suenter adina puspei fadetgnas giuvnas che portan buns brumbels che las selvaschinas maglian bugen. Ni che nus mirein ch'ils englars els uauls restien libers, vul dir, ch'els creschien buca en. Per ch'ei detti leu era empau pastg andant per las selvaschinas seghein nus quels e dustein sterpa e crappa etc. Era mises che vegnan buca duvrai e buca fatgs pli e ch'ein per part sil precint da crescher en runchein nus, derschin e dustein cagliam e mirein ch'ei detti vinavon pastg e loghens da campar per las selvaschinas. Aschia mirein nus ch'ellas anflien els aults quei ch'ellas drovan e vegnien buca memia stedi giu els vitgs. Cun quei engaschi san ils catschadurs era mussar ch'els buca mo settan las selvaschinas, mobein ch'els han era quitau che quel-

las possien prosperar en in bien ambient.

*Qualas ein Vossas incumbensas duront la stad?*

Damai che nus essan menziunai ella lescha da schurmetg da bulius e flora sco organ da survigilonza era per la raccolta da bulius, vein nus se capescha duront ils meins da stad dad ir a vilentar la glieud sco controlladers da bulius. Cheu schabegia ei lu meinsvart che nus confischein en ina sonda entuorn 150 kg bulius. Quellas controllas fagein nus per part ensemene cun la polizia cantunala. Las multas che nus stuein reparter per tal raccoltar senza mesira ein lu naturalmein considerablas. Ei dependa se capescha con da memia ch'ina persuna ha rimnau. Igl ei gia schabegiau che persunas cun special regl da rimnar bulius han stuiu pagar multas denter 200 e 500 frs. Meinsvart vein nus traplau rimnaders che havevan tochen 20 kg da memia enstagl dils dus kilos lubi. Ils quantum ch'ein da memia vegnan confiscai e vendi als hotels, ustrias ni era a privats.

In auter pensum ch'ei adossaus a nus ei la pesca. Nies uffeci senumna gie: «Uffeci da catscha e pesca». Cu in lag da fermada vegn svidaus, mein nus e prendein ora ils pèschs e mettein quels en in auter liug, nua ch'els han aua avunda. Era ils uals ellas vals lateralas

survigilein nus e vein in egl aviert ch'ils pèschs stoppien buca pirir en quels per munconza d'aua. Plinavon mettein nus adina puspei ora pèschs giuvens el Rein, els uals ed els lags naturals ed artificials da nossa cuntrada. Quei fagein nus ensemene cun il guardiapesca, Roland Tomaschett da Trun. Ultra da quei fagein nus era controllas da pesca, quei vul dir nus controllein ils pescadurs ch'els setegnien vid lescha e prescripziuns.

Viers la fin dalla stad, cura ch'ils catschadurs entscheivan a survegnir febra, prendin nus giu examens da sittar dils candidats da catscha. Igl examen pils Sursilvans ei a Mustér/Sars. La teoria dils examens da catscha succeda la primavera precedenta en divers loghens da nies cantun. Tgi che vul far quel per romontsch sa far quel a Cuera cun in expert romontsch, tgi che vul far quel per talian fa quei a Roveredo.

Plinavon fagein nus era la controlla dallas buis che vegnan duvradas per ir a catscha. Quellas ston corrispunder alla segirtad prescreta e vegnan registradas e pertadas el cudischet persunal da catscha. Quei ch'ei da dir ei che nos catschadurs han il bia in pulit quet cun lur buis ed han bien quitau da quellas.

*Nua van ils catschadurs per lur patentas da catscha?*

Ils catschadurs vegnan tier nus per la patenta da catscha. Las patentas vendin

nus en divers loghens, numnadamein a Sedrun, Curaglia, Mustér, Sumvitg, Dardin ed ina pintga part tier mei a casa. La patenta da catsch'aulta cuosta per in indigen, pia per ina persuna che habitescha cheu e che paga cheu taglia, 690 frs. In burgheis svizzer ch'ei da present buca sesents en nossa cuntrada, che ha denton habitau cheu duront 10 onns, sa era ir a catscha cheu tier nus e survegn la patenta per 1327 frs. Ina persuna digl exterior paga 13 271 frs. per la patenta da catscha aulta grischuna. Catschadurs che setegnan buc vid las obligaziuns finanzialas, p. ex. che han buca pagau il quen da taglia, san buca acquistar la patenta da catscha. Nus fagein la vendita da patentas da cumionza. Il pensum da «polizia da catscha» ei naturalmein era adossaus a nus. Ils biars catschadurs han capient tscha per quei pensum ed enqualin buc, mo ei sto esser, schiglioc vessen nus en buca ditg il dètg uorden.

*S'audan lavurs d'administraziun era tier Vies pensum?*

Secapescha ch'ei va era en nies mistregn buca senza in bienton lavur d'administraziun. Nus vein da far bia giudicaziuns pertuccont las consequenzas che sedessen, sch'enzagtei vegness baghegiau sin territori ch'ei d'impurtonza per las selvaschinas. Plinavon seradunein nus mitg'onn cun

ils responsabels per la planisaziun dalla catscha en nies cantun per dis d'evaluaziun, nua che nus targein bilanza, schebein il quantum selvaschinas ch'ei vegnius daus libers da sittar ei staus giustificaus e contonschius ni sch'ei drova correcturas en in ni l'auter daquelrisguards. Quelsdisd'evaluaziun e da scolaziun han liug mintg'onn duront ina jamna l'entschatta fevrer a Maiavilla en il center da scolaziun pigl uaul. El decuors digl onn dat ei sis ulteriurs schinumnai rapports ni dis da scolaziun che cuozan in tochen dus dis. A caschun d'in tal la fin october vegn p. ex. era fixau nua, cu e contas tscharvas e cons cavreuls che ston ni astgan vegnir sittai duront la catscha speciala.

*Co ei la bilanza dalla catscha aulta 2010 curdada ora en cumparegliaziun cun la planisaziun dil diember d'animals che duevan vegnir sittai?*

La primavera 2010 ein vegnidias dumbradas en la Cadi 794 tscharvas. 371 han ins protocolau en Sursassiala (areal 1.1) e 423 sin il territori da Sutsassiala (areal 1.2). Ensiviars han ins quintau ina cefra stgira da 25% ed engiuviars da 20%. La cefra stgira ei tscharvas ch'ins ha buca viu duront la taxaziun. Aschia ei vegniu quintau cun ina populaziun da 1014 tscharvas che vivan la primavera en la Cadi. Plinavon havein nus risguard

## Planisaziun dalla catscha da tscharvas

district da catscha I Rein Anterior  
calculaziun cun cefra stgira 2010

Areal da catscha district I	Resultat dalla taxazlun da notg		Populaziun da primavera calculada diember (naschientschas) 39 %	Rata dalla populaziun nova (naschientschas) 39 %	Populaziun d'atun calculada	Sperdita calculada 4,3 % dalla populaziun d'atun	Augment della populaziun
	diember	cefra stgira en %					
1.1	371	25 %	495	193	688	30	163
1.2	423	20 %	529	206	735	32	174
<b>Total</b>	<b>794</b>		<b>1024</b>	<b>399</b>	<b>1423</b>	<b>62</b>	<b>337</b>

## Planisaziun dalla catscha da tscharvas

district da catscha I Rein Anterior  
Plan da sittar 2010

Areal da catscha district I	media dallas tscharvas sittadas 1987–2009	previu da sittar 2010		plan	cumparegliazlun cun 2009		
		total	tscharvas femininas		tscharvas sittadas	tscharvas femininas	sittada qualitativa
1.1	148	160	80	160	131	57	-23
1.2	157	160	80	160	109	51	-29
<b>Total</b>	<b>305</b>	<b>320</b>	<b>160</b>	<b>320</b>	<b>240</b>	<b>108</b>	<b>-52</b>

dau 399 naschientschas, quei vul dir vadials tscharva che neschan. Pia sresulta igl atun ina populaziun da 1423 tscharvas en la Cadi. Sch'ins subrahe-scha 4,3% sperdita, 62 vadials dallas 399 naschientschas, dat quei in carschament dalla populaziun da 337 tscharvas.

Sin fundament dalla calculaziun cun in augment da 337 tscharvas per igl onn 2010 en la Cadi ei vegniu planisau da

sittar duront la catscha 320 tocs. Da quellas 320 tscharvas ston 160 esser da schlatteina feminina. Sch'ins cumpareglia quei cun igl onn 2009, ei quei 80 tscharvas dapli. Suenter in fetg stregn unviern 2008/09, duront il qual 398 tscharvas ein idas alla malura, han ins sapientivamein fatg igl onn 2009 in plan fetg bass cun 240 tscharvas. Cun in manco da 52 tscharvas han ins era buca vuliu ademplir quel per tut prezi.

## Tscharvas sittadas en il district da catscha I naven digl 1. da zercladur 2010

Stan: 31-12-2010

	Total	animals masculins			animals feminins			relaziun denter las schlatteinas	
		taurs	jontschets	vadials	vaccas	stiarlas	vadialas	tuttas	1 onn +
tscharvas sittadas dils guardiaselvaschinas per prevegnir donns naven digl 1-06-2010 tochen 31-08-2010	0								
<b>Preda catscha aulta</b>	<b>283</b>	<b>123</b>	<b>26</b>	<b>5</b>	<b>59</b>	<b>63</b>	<b>7</b>	<b>1:0.84</b>	<b>1:0.82</b>
naven digl 1-09-2010 tochen 11-09-2010 e naven dils 20-09-2010 tochen 28-09-2010 tscharvas cun blessuras da siet tscharvas sittadas dils guardiaselvaschinas naven digl 1-09-2010 tochen 19-10-2010	0								
<b>Preda catscha supplementara</b>	<b>43</b>		<b>15</b>		<b>11</b>	<b>1</b>	<b>16</b>	<b>1:1.80</b>	
20/21/27 e 28-11-2010 tscharvas cun blessuras da siet e tscharvas sittadas dils guardiaselvaschinas per ademplir il plan previu naven dils 20-10-2010	2			1			1	1:1.00	
<b>Total</b>	<b>328</b>	<b>123</b>	<b>26</b>	<b>21</b>	<b>70</b>	<b>64</b>	<b>24</b>	<b>1:0.93</b>	<b>1:0.90</b>

Duront igl onn 2010 ein vegnidas sittadas 328 tscharvas en la Cadi. 283 duront la catsch'aulta e 45 ni 13,5% che vegnan quintadas tier la catscha d'atun respectiv catscha supplementara. Cun 328 tscharvas ei il plan che preveva da sittar 320 vegnius sursittaus per 8 tocs. Dumbran ins denton ensemes las tscharvas femininas vegnan ins sin 158, pia in manco da duas tscharvas. Tenor miu manegiar in excellent resultat.

Sin quella tabella figureschan tuttas selvaschinas d'ungla ch'ein vegnidas sittadas 2010 duront la catsch'aulta, la catscha da capricorns sco era el decuors dalla catscha supplementara sin tschar-

vas e cavreuls sin il territori dalla Cadi. Tut ensemes 721 selvaschinas. Da quelles havein nus pesau e mesirau frestgas, quei vul dir en pial, 685 tocs ni 95% duront la catscha. Dallas ulteriuras 36 han ils catschadurs stuiu presentar la trofea eni la missiala per examinaziun suenter la catscha. Ils meins d'atun ein fetg intensivs quei ch'appartegn la lavur. Dis per part da 15 uras da lavur ed aunc dapli ein la realitad. Mintga guardiaselvaschina presta duront il meins da settember entuorn 350 uras da lavur.

*Dat ei momentan problems pli specials el district da catscha I, Rein Anterior?*

## **Selvaschinas sittadas en il district da catscha I, Rein Anterieur (Cadi) onn 2010**

Territoris da survigilonza respectiv da vischnaunca	Tscharvas				Cavreuls				Camutschs		Capricorns	
	sittadas da		sittai da		sittai da		sittai da		catscha da capricorns		sittai da catscha	
	catscha aulta	catscha d'atun	m.	f.	m.	f.						
1 Tujetsch	16	18	2	3	16	10	2	3	11	14	5	4
2 Medel/Lucmagn	28	18	4	7	5	5	1		40	43	4	4
3 Disentis/Mustér	31	19	5	6	18	7			17	16	1	1
4 Sumvitg	40	30	5	8	6	8			25	25		1
5 Trun	18	20		3	8	4			19	13	1	1
Schlans	3	6			3	2			4	3		
Breil/Brigels	18	18		2	10	8			10	8	4	3
<b>selvaschinas sittadas tenor schlattelina</b>	<b>154</b>	<b>129</b>	<b>16</b>	<b>29</b>	<b>66</b>	<b>44</b>	<b>3</b>	<b>3</b>	<b>126</b>	<b>122</b>	<b>15</b>	<b>14</b>
<b>selvaschinas sittadas total</b>	<b>283</b>		<b>45</b>		<b>110</b>		<b>6</b>					
<b>Total district I</b>	<b>328</b>				<b>116</b>				<b>248</b>		<b>29</b>	
<b>relaziun denter las schlatteinas dallas selvaschinas sittadas</b>	rs 1:0.93				rs 1:0.68				rs 1:0.97		rs 1:0.93	

Gie, dapresent, quei vul dir la fin da december 2010 vein nus giu da cumbatter cun la tschoccadad dils capricorns en Tujetsch. Leu vein nus dacuort stuiu sittar treis bucs ch'eran i tschocs alla malura. Animals ch'ein malsauens stuein nus naturalmein era sittar. Quels cadavers schein nus, sch'els ein buca damaneivel da habitadis e dall'aua, tenor pusseivladad denter la crappa. En buca ditg vegnan las uolps, ils tgapers, ils tschéss ed eventualmein il tschéss barbet e beinspert ei nuot pli dentuorn.

Lu pretendan las marcaziuns dils asils da selvaschinas e las zonas da ruaus pulibria attenziun. Ellas dattan in bienton lavur entochen ch'ellas ein signadas daperput adequat. Plinavon mettein nus era tscheu e leu tablas cun avis specials pils viandonts e turists pertucont il risguard ch'els duessen prender viers ils animals selvadis e lur zonas da schurmetg. Quei dat tut lavur. Meinsvart dat ei donns da selvaschinas, seigi quei tascharvas, tais ni fiergnas en ils plantius sco era tgapers che nus stu-

ein cussegliaar tgei far per prevegnir donns e disturbis. Denton savein nus propi dir ch'ils purs ein cheu tier nus aunc fetg generus viers ils animals selvadis. Tais che fan tut sutsu cun scavar ora ils cos pils praus ed orts dat ei mintgaton buc autra letga che sittar enqualin per ch'ei detti ruous.

Quitaus fan magari era las selvaschinas, oravontut las tscharvas che han cattau adagur ils composts els orts e curtgons. Damai che quels ein mo darar cuvretgs cun in uvierchel che la selvaschina sa

buca dustar, carmalan quels ellas da maniera ch'ellas fan stediamein viseta era en nos vitgs e vegnan aschia pli e pli dumastiias. Quei ei buca in bien svilup. Atgnamein stuess mintga deposit da compost propi esser cuvretgs aschia che las tscharvas vegnan buca da dustar igl uvierchel, schiglioc ston ins buca smarvegliar da lur visetas regularas buca mo els composts, mobein era els orts sper casa. Ins auda savens che pli baul deva ei buca da quei. Cun raschun, avon 100 onns eran las tscharvas ragischadas ora

**In tschéss giuven en siu igniv. Sper el sesanflan restonzas d'ina lieur grischa, d'ina muntaniala e d'in iev marsch, Val Nalps, 19-06-2008.**



Foto: Werner Degonda

el Grischun e las lavadiras vegnevan buca dismessas en curtgin sin in migliac e compostadas.

Ina biala caussa ei per mei era il pensum d'observaziun dil tschéss e la laver da statistica da quella populaziun enteifer igl entir cantun Grischun ch'jeu fetschel per mauns pigl uffeci da catscha e pesca. Momentan ein 113 pàrs da tschéss enconuschents als guardiaselvaschinas dil Grischun. Da quels ein 27 pàrs vegni eligi ora e vegnan observai intensivamein. Tenor peda e pusseivladad mein nus era a marcar tschéss giuvens. Quei fagein nus cun consentiment digl observatori ornitologic «Vogelwarte» a Sempach.

*Tgei sistem da laver haveis Vus cun tut quellas incumbens?*

Il guardiaselvaschina vegn clamaus da tuttas uras sch'ei schabegia enzatgei cun in animal selvadi, p.ex. sch'ina tscharva ni in cavriel vegn tschaffaus enten traversar la via dad in auto. Ni sch'enzatgi vesa in animal selvadi malaun.

Nus luvrein diesch uras a di. Meinsvart dat ei dis cun dapli uras e magari era da quels cun zatgei pli pauc. Ils meins dil davos quartal digl onn ein sco gia menziunau fetg intensivs. Las uras da laver ein da purtar en ina tabella. Mes conluvrers han il medem sistem e ston far lur plan da laver e render quen dil pre-

stau tenor quel. Els han da far lur pensum da laver tenor ils procents dalla plazza ch'els han.

*Ha la laver dil guardiaselvaschina survegniu ils davos onns aunc incumbens novas?*

Gie, cun la lescha da catscha nova van las puniziuns da catscha era sur nies uffeci. Sch'in catschadur ha pia sittau ina selvaschina ch'el vess buca astgau, sto el vegnir cun ella tier nus. Nus registrein lu ella, tenor la procedura da castig disciplinar, il catschadur paga il castig stipulaus persuenter e la caussa ei finida. Ei dat pia buca pli in cass penal che vegneva pli baul tractaus dil mistral. Il catschadur vegn era buca registraus enzanua sco enzatgi che ha fatg in malfatg.

*Tgei fa ils pli gronds quitaus a Vus?*

Ch'il spazi da viver dils animals selvadis vegn mintg'onn pli e pli pigns fa a mi propi quitaus. Las purschidas dil sport vegnan dad onn tier onn pli e pli differentas e numerusas ed ei dat strusch in liug pli nua ch'ei dat propi negins disturbis. Seigi quei giun plaun ni ell'aria. P.ex. quels che van cun gianellas crusch e traviers tras uauls e disturbant e spuentan las selvaschinas ch'ellas vegnan spossadas dallas reservas. Sche quei schabegia adina puspei ei meinsvart la mort digl animal selvadi la consequenza. Denton fan era quels che van ad

encurir corns cura ch'ils taurs tscharva bettan giu quels fastedis als guardiaselvaschinas. Quei succeda numnadamein lu, cura che las selvaschinas han tut tenor unviern duvrau si tuttas reservas. Ils pli biars che tschercan corna ein catschadurs, che stuessen saver tgei ortgadad ch'els fan visavi igl animal selvadi. Denter quels sesanflan per part era quels che tschentan en damonda tut quei che stat en connex cun la planisaizun da catscha.

*Con savens davantan selvaschinas unfrendas dil traffic?*

Quei schabegia aunc meinsvart, cunzun viaden egl atun cura ch'ei vegn baul stgir. La persuna che va cugl auto ed ha in tal discletg astga buca ir giu dil plaz avon ch'il guardiacatscha ei staus el liug per saver constatar la confruntaziun. En cass ch'igl animal ei aunc vegnius da scappar giu dil plaz sto il guardiacatscha saver prender si il meglier pusseivel ils fastitgs per encuir el e saver sittar el, buca ch'igl animal blessau stuessi pitir aunc ditg. Il meglier ei da telefonar immediat alla nr. 117. Quei ei la numera dalla polizia. Quella dat lu vinavon quei clom al guardiacatscha responsabel.

*Tgei ei quei che fa a Vus il pli grond plascher en Vossa clamada?*

Las observaziuns dils animals giuvens duront la primavera, principalmein su-



**Tschéss-barbet «Sardona» en  
Tujetsch, Val Strem, ils 11 d'octobre  
2010, accumpignaus da dus corvs.**

Foto: Gabriel Monn

enter in stregn unviern. «Has ti gia viu anseuls?» «Gie, jeu hai viu tscheidi in!» Aschia tuna ei lu denter nus guardiaselvaschinas.

Sch'jeu tuornel a casa dad ina tura, p. ex. ord Val Sumvitg, ed hai viu duront quella tuttas sorts d'animals d'ungla, quei vul dir tscharvas, cavreuls, camutschs e capricorns sco era ina partida sorts utschals, lu ei quei per mei in di da cumpleina satisfacziun, tonpli sche las selvaschinas ein saunas e tafras.

*E tals dis giavischel jeu a Vus, prezian signur Degonda aunc biars, biars! Cordial engraziament per Vossas explicaziuns e bien success en tut Vossas interpresa en favur dils animals e da nossa biala natira.*